

四庫全書

集部

欽定四庫全書

集部

篋墩文集卷六十二

詳校官編修臣李堯棟

中書臣劉源溥覆勘

總校官進士臣朱鈐

校對官監丞臣張魯炳

謄錄監生臣王恩溥

欽定四庫全書

篁墩文集卷六十一

明程敏政撰

頌 歌曲 古樂府詩

平逆頌

天順辛巳秋敵帥博囉擁衆寇迤西上命懷寧伯
鏜帥師禦之而以兵部尚書昂節制其軍先是昭
武伯欽及其黨以靖難功權傾中外上稍裁抑之
遂蓄異圖時以七月二日出師欽約其兄都督鐸

從兄都督鑄弟都指揮鉉謀入內為亂推其黨之
黠者為謀主而以其部所典禁兵及其仲父宦者
吉祥為內援并結番將都督巴延額森等數十人
以樹黨是日都指揮旺扎勒圖亮詣長安門告變夜
二鼓宮中聞變詔侍直中官執吉祥以俟天曙漏
下四鼓舉兵犯闕合番漢人五百騎直抵禁城雷
鼓大振搥殺錦衣指揮景擊翰林學士賢傷首并
執吏部尚書翱於東朝邸鐸帥數騎而西殺左都

御史深斲傷廣寧侯安時禁門未啟欽督其黨縱
火焚東西皇城門及東華門朝臣悸散莫知所出
達曉王師始集詔會昌侯繼宗將之鏜督諸軍先
登恭順侯瑾及諸將臣分道逆擊昂以精兵殿之
首尾聯絡旗鼓相望欽退屯東華門鏜以衆接戰
王師銳甚賊衆披靡自辰至午敗鏜斬之欽中流
矢創甚振策以馳適瑾將五六騎出覘卒與欽遇
衆寡不敵力戰死之還駐東大市街相拒至酉鉉

以百餘騎往來馳突者三王師環結不動自相枕籍鏜令執潰者斬以徇責戰益急發神臂弓射之追斬鉉欽益懼使百餘騎還攻朝陽門不克諸軍進薄其衆大破之鐸為亂兵所殺欽入其家溺胷井中其黨巴延額森等縋城以遁遣兵追之皆被獲是晚乘輿出御午門朝百官詔下吉祥及巴延額森等於御史獄皆伏誅仍以鐸棄市而磔欽屍籍其家以賚將士餘黨並落二職流嶺南旌死節

功追封瑾梁國公謚忠壯贈深少保謚莊愍論功
行賞加繼宗太保安太子少傅賢翺昂並以本官
兼太子少保鏜賜爵徹侯而進旺扎勒圖亮為都督
餘將士加官進爵有差明日下詔暴欽罪於中外
於戲不測之虞起於一旦若此伏惟皇上聖德神
武荷天地廟社之休不旋踵而醜類殄滅宮闕肅
清稽古考經宜有紀述臣誠不佞謹撰平逆頌一
首雖不敢上備尚書故實亦少見愛君尊主不能

自己之誠于萬一云爾

煌煌大明五葉嗣承爰及我后奉天中興既脩既攘內
外時又有孽其間欲梗予治蠢茲吉祥實維寺人中懷
孔姦曹騰之孫假子曰欽開國昭武手提禁兵孰敢予
侮后惡其驕曰爾永圖欽乃蓄異萃彼逃逋中構吉祥
以逞無賴以效阿瞞而力弗逮孟秋既朔熒惑在垣伺
間而舉信聲喧喧燔我闕門戕我朝士蹀血東西金吾
御史惟相惟將臣賢臣安如唐衡度被斫被殘飛變夜

聞后赫斯怒曰爾繼宗元舅元輔往暨爾鐘用整厥師
爾瑾先驅爾昂殿之靖此皎通惟爾之績爾惟弗績罪
弗爾惜衆奮其武如羆如熊大旗翻翻礮聲震空賊鋒
始交逆陣而閔瑾喪其元人百其勇再鼓以進羣醜遂
奔乃馘乃俘奏功轅門免技斯窮如醉罔省反走厥家
授首智井梟徒獍隊不日成禽天開日舒青銷沴沈后
御午門告爾大衆罔治脅從無怖無恐吉祥就礪欽首
懸竿藁街閔閔都人快觀乃瀦其居乃殄厥世爾族爾

嫺投屏四裔籍錄所入有帛有金爰搞我士凱歌謳吟
勸忠褒功后有明詔公侯公孤有券有誥羣臣稽首我
后永貞大憝既平聖武乃成我后曰嘻惟天之祚將率
之力祖考之祐允顯聖德巍巍難名告功萬世敢揚頌
聲

大明中興鐃歌鼓吹曲

臣聞鐃歌鼓吹有曲尚矣然自漢後率以頌勦業
之主而中興蔑聞焉豈非其臣之少文無以極揚

厲之美或其主之德業容有不足聲者邪臣備員
從官親見陛下嗣統以來拔去奇衰刻平僭亂盛
德大業振古所無而頌聲不揚無以顯示後世臣
竊歎焉謹撰大明中興饒歌鼓吹曲八章雖其辭
意荒謬不敢上擬古作然倡之而來雅音被大樂
用昭陛下聖德大業于無窮或自臣始臣不勝願
望之至謹列于左方

宣重光

歲甲申上御奉天門道揚永命朝羣臣即位改元
作宣重光第一

宣重光煒以煌離火出被四方朱鳥下金鳥翔啓鴻徵
猗我皇乘六陽健以剛闢午門坐明堂庶績熙兆姓慶
顯皇德覲復揚建大化高百王帝敷賁祿穰穰於萬年
祚有明

右宣重光二十二句句三字

難壬人

上之初立也諸務未遑而中外素干政刑之臣或竄或流朝野稱慶作難壬人第二

難壬人九土服淫朋自孽匪予僂違乃庸圯女族渾敦
饕餮堯所弗矧女寺越女僕干予政刑恣女毒屏四裔
禦魍魎褫女組綬繫之往宮若府肅以清惟獨斷皇之
明皇之明國之貞

右難壬人二十二句十八句句三字四句
句四字

斷峽藤

廣西徭人自大藤峽蔓于東擾雷廉高肇四州遣
師討之寇平作斷峽藤第三

斷峽藤克蠻嶠破頑陰發靈曜薄海四隅皇德冒叢爾
醜背聲教皇人旅興殄爾暴蛇豕平捷屢告山殷殷波
浩浩舟車來嶺南道清二廣睿謀造

右斷峽藤十八句句十六句句三字二句句
四字

剗大竹

蜀賊趙鐸據棧口以叛邊吏奉詔率松潘兵東下
敗賊于大竹鐸死作剗大竹第四

剗大竹竹裂瓦鼓田田振原野弗工者誰駕駟馬旅拒
王人堅壁下絙棧與閣道不可假我師感之旗夜禍六
番來同自黎雅孰定民痛若贅與瘕大鉞殲之血流赭
躡厥逋人若土苴川沴消奏章夏

右剗大竹二十二句十二句句三字十句

句四字

掃攬搶

荆襄流人合妖僧煽衆劫竹山諸縣遣將討之妖
僧走蜀偏師追獲以獻作掃攬搶第五

攬搶明應荆楚雙女之分路伊阻么麼竊起竹山下
信猢蜮病斯土皇赫斯怒整厥旅將士洸洸闕虢虎渠
魁面縛偏師走戈船追獲蜀江許妖氣夜掃芒不吐四
海謳歌聖布武

右掃攬槍二十句十一句句三字九句句
四字

靖山戎

山都掌蠻跨川貴之境流毒罔悛詔發蜀楚雲貴
兵征之下龍背豹尾若入凌霄城天井洞殲厥醜
易其地為太平川作靖山戎第六

靖山戎渡瀘水蠢弗戢罔攸悔考銅輦祀牛鬼驅我旄
倪蠆毒肆起皇曰咨女率往代予理朱旆來賊頻委踏

龍背剪豹尾凌霄城踏天井圮錢道不阨氓不痛殲厥
繁徒樹新壘一舉甌蜀平遠邇咸喜於皇廟謨萬世斯
紀

右靖山戎二十四句句十三句句三字九句
句四字二句句五字

西河清

敵據黃河套歲入寇延寧西師弗解遣將行邊倖
敵以獻作西河清第七

西河清自延銀莽黃流浩沄沄河之陰漠無垠中有狼
子赴厥草蕃時率旆與殺入我塞門王師大蒐窮爾窟
扼爾雄吭彌爾族弧矢流晶獍狼不敢燭秦人子來共
祝皇永釐

右西河清十八句八句句三字七句句四
字三句句五字

石城摧

平涼賊滿肆約降戎入石城構兵稱亂遣兵

討之至靖虜築長圍困而擒之作石城推第

八

歸歸石城堅不可推跨雍界涼路紆且回中有大醜逞
其兇能誘我降阿逆聲喧皇曰驚哉是不可徠爰命
將士戡此旣胎乃塹乃圍絕其往來如獸在穽勢窮而
歸邊吏胥慶城門夜開我馬不隕野無戰埃臣拜稽首
惟皇德威惟皇德威邦人永懷

右石城推二十四句句四字

黃石操

留侯遇圯上老父之事若近於怪以予觀之殆讀史者之不審也史載老父與留侯約異日見濟北穀城山下黃石即我也後留侯果得而祠之味史之言乃老父自謂其年已邁後當葬彼以黃石志其處亦猶莊子所謂索我於枯魚之肆耳留侯得而祠之蓋尊其冢上之物示不忘其人也今乃謂老父化為黃石豈理也哉予過圯上有感其事為

賦琴操二章

我營一丘兮濟水之碕有黃石兮燔如柅嗟日暮兮見
子無期子行矣兮為帝師乘車馬兮來何時索我兮安
之宿草兮離離懷弊屣兮下邳見黃石兮如台凝予
睇兮穀城之下有黃石兮志抔土思晤言兮我翁渺
予心兮愁苦感翁惠兮一編書俾我侯兮萬戶駕言
兮歸來清觴豆兮潔肴俎嗟奉足兮無因寶茲石兮
終古

二交頌

甚哉朋友五倫之一而其道之喪也久矣切
怪夫大學之傳至善中庸之論達道餘無加
之詞者而獨於朋友增交之一言何哉誠以
彼四倫者其名稱皆出於天而不可易反之
則爲逆爲悖無所逃罪焉惟朋友則視夫交
者之何如交之得其道斯稱其名否則漠然
路人焉耳朋友云乎哉昔者嚴子陵當漢之

中興而獨全友道於英哲之君謝臯羽當宋
之既亡而獨全友道於忠義之相之二子者
蓋深有見夫世之號朋友者其初未始不密
其終未始不離大之賣其國小之覆其家而
戕其身故挺然不屈於富貴毅然不相忘於
死生以愧夫世之號朋友者而君子不察謂
子陵爲全身高潔之人謂臯羽爲慷慨悲歌
之士反於倫理若有憾焉其不得夫二子之

心也甚矣予省覲北歸泛桐江宿所謂釣臺
之下慨然有感於子陵之宅皋羽之塚江山
依然草木如故而卒未有探其心於千載之
上者故爲二交頌酌水而去之二子者有靈
固將謂此語爲知己也夫頌曰

明明天倫帝降之衷責善盡性友在其中交匪其
人百善斯誼先覺有訓孰奉以共靡愼其始尚求其終
數家傾國友道斯窮有倡其風在漢嚴翁懿此嚴翁夙

家於桐龍困於野惟翁是同龍升於天翁舉斯鴻友道
乃全風流譽崇下此千載卓哉謝公謝公巖巖居粵之
東佐相從戎相死於忠惟相之思乃心忉忉友道再
全叔世之雄嗟嗟小子恫恫顓蒙稽首嚴祠江青山空
釣遊之處蔓草蔥蔥惟臺之南惟謝之宮野哭之地寒
吹淅淅繫二子心不折如銅繫二子名不刊如嵩我作
頌詩以諗臣工有善斯馨有過斯攻全彼交道萬世之

功

門有車馬客行

席為門茅蓋屋窮巷蕭然媚幽獨里中却有張氏翁能
識陳郎非碌碌有女不嫁王侯族願與陳郎侍櫛沐陳
郎居處非樓臺席門終日凌風開魏冠時有長者來車
輪馬足飛黃埃蛟螭自古困泥滓男兒豈久居蒿萊偉
哉陳郎被戎服從赤龍逐秦鹿宰制天下如宰肉分茅
既受五侯封秉鈞更享千鍾祿張氏女鬢未蒼魚軒命
服何煌煌始知乃翁眼力長何事兒孫廢繩武不知門

外有韋郎

君馬黃

周穆王挾造父乘飛黃謁王母曉馳黃澤西夜宿
瑤池澣一曲蟠桃宴未終玉帛紛紛向徐土回首
西京路脩阻縱有飛黃竟何補君不見漢高側室
兒能却千里馬拱手垂衣治天下南粵稱臣無叛
者

牆上難為趨行

君子如處子一生當守身願學段干木不學宋東鄰

將進酒

安漢公將進酒蝮蛇蜿蜒持在手未央宮中日將
酉一杯才入君王口六宮便作招魂啼太后朝來
號王母君不見申氏子伶其身內庭侍宴將及晨
坐中起為壽刃此手足親申氏子長眉顰奪取一
吸如飲醇肝腦不惜塗宮綯吁嗟此意寧求伸不
忍他人害兄弟何況自己忘君臣安漢公非得計

四海孤身葬無地
早知今日反羞伶
何似當初莫稱帝

驅車上東門行

雉堞連雲起秦城
屬漢家更無丞相
犬猶有故侯瓜

銅雀妓

魏公好色不知足
愛子已為張繡戮
歸來不悔舊時差
臨河更把高臺築
臺上美人如萬花
日日歌

管聲誼譁老瞞自欲比西伯內則何似周王家當時
美人浪自許各逞新粧奉新主豈徒媚惑令主昏治容
誨淫吾不與君不見鄴中長想二喬來有心不到黃公
女

右古樂府凡六篇十五年前所作弊篋中見之不忍
棄之因錄于此歲不我與而學不加進為之慨然成
化丙申冬十月望日

辟廱

辟靡送大司成耿公也

有嚴辟靡四方之則孰其師之一人孔碩眷此碩人明德是崇穆其家風自清惠公侍禁有聲出教國子橫金服緋再命伊始戟門夜啓舍菜于庭碩人顧瞻是儀是刑朝鼓鏜鏜碩人升坐諸生執經或右或左相帝之治爰藉羣才進此碩人樂哉斯培材成孔多功亦云懋耆俊之求入副元后允茲明良庶事攸康蔚有耿光吾道之昌

右辟廱八章章四句

巫山高

自古言楚襄王夢與神女遇以楚詞考之則
有甚不然者高唐賦序云先王嘗遊高唐夢
一婦人曰妾巫山之女朝為行雲暮為行雨
則夢神女者懷王也神女賦序曰楚襄王與
宋玉遊於雲夢之浦使玉賦高唐之事其夜
夢與神女遇異之明日以白玉玉曰其夢若

何王對曰晡夕之後精神恍惚若有所喜見
一婦人狀甚奇異王曰狀何如也王曰茂矣
美矣諸好備矣瓊姿瑋態不可勝讚王曰若
此盛矣試為寡人賦之夫既云王曰茂矣美
矣又云王曰若此盛矣何其前後之複哉況
人君語臣不當曰白答臣不當曰對且其賦
曰他人莫覩王覽其狀望予帷而延視兮若
流波之將瀾以為宋玉代王賦之如王之自

言則不當云王覽其狀既云王覽其狀則是宋玉之言矣又不知稱予者誰也以此考之其夜王寢夢與神女遇者王字乃玉字明日以白玉者白王也王與玉字先後互書之誤耳前日夢神女者懷王其夜夢神女者宋玉襄王無與焉從來枉受其名耳

十二峯頭雲似絮十二峯下翻盆雨朝朝暮暮雨復晴不知誰是陰晴主中有美人高髻鬟神宮杳杳居

深山人間有路不可往雲屏霧障愁躋攀懷王夜宿
無人共忽有山靈入幽夢醒來不見意中人但覺陽
臺曙光動侍臣宋玉多才名高唐一賦深有情自言
親到巫山裏美人再會如平生雲雨當年只如此襄
王却是無名子後人不解真是非誤把遺跡著詩史
巫山高高嶙峋楚宮花木今幾春何時倚擢危峯下
一弔襄王父與臣

明妃曲

後漢匈奴傳言呼韓邪單于來朝願為漢
壻後宮王嬙以積怨自請行此事之實也
西京雜記乃云元帝使畫工毛延壽圖宮
人形貌按圖召幸王嬙以賂金少畫不及
貌及賜單于宮人王嬙當行帝見之悔乃
殺延壽夫元帝柔仁之主謂其因女色殺
畫工固不可信而王嬙以無寵自請行誠
一污賤女子耳後之為昭君曲者多歸咎

元帝殊不當云

明妃本是巫山女貌美如花解人語家門正對楚
王臺慣聽鄉人說雲雨一朝被選入漢宮幾年不
識天子容宮車日日向何所魚鱗只把長門封象
牀不寐心如擣自惜紅顏暗中老裝回顧影淚雙
垂生死不如臺下草胡王欲得漢家姬六宮盡感
雙蛾眉孤懷不覺心語口猶勝永巷常淒其欣然
獨上羶車裏胡王得之驚且喜短簫吹出霸陵橋

兩兩睢鳩水中起古城北去多戰場黃沙白草春
無光多情自得虜庭樂回首漢月空茫茫打圍夜
向陰山宿更為胡王理絲竹漢家莫悔誤和戎琵琶
不是思歸曲

結襪子

楊鐵厓以此題歸之張釋之子
愛其善閑乃效之得二篇

文王伐崇至鳳凰之墟而襪係解文王自結
之太公問焉文王曰吾聞亡君所與處弗盡
其役寡人雖不肖所與處皆先君之人也故

無令結之

有崇不道干天誅西伯杖鉞登戎車夜發渭水濱曉
至岐山隅朱絲履結忽自解玉帳彳亍難為趨左顧
顛适右閤散冠劍濟濟非庸奴低頭自結雙帶子大
聖自與常人殊嗚呼大聖自與常人殊溺冠騎項將
何如

唐昭宗還長安朱全忠嘗侍殿上昭宗意衛兵
有能擒之者乃佯為鞋結解以顧全忠全忠跪

而結之左右無敢動者全忠汗流浹背

梁王未赴宣武軍崇勲殿上酬元勲君臣面慶若魚
水心腹戈矛人不聞天容慘淡愁風雲烏帶忽解雙
龍紋特勅梁王手親結左右不敢生紛紜老奸長跪
黼座下浹背汗流如救焚嗚呼天子賤役爾當結碣
山賊徒何足云

前旌操

古樂府前旌操者為衛公子伋壽而作也詩

乘舟之疏與左傳所載甚詳曰宣公烝於庶
母夷姜生伋為娶於齊而美公取之是為宣
姜生壽及朔朔與宣姜譖伋於公公使伋之
齊使盜先待於隘而殺之壽告伋使行不可
壽竊其旌以往盜殺之伋至曰君命殺我壽
也何罪亦死於賊予考之宣公以魯隱四年
十二月立至桓十二年十一月卒凡十有九
年姑以即位之始便成淫亂而伋即以次年

生勢須十五年然後娶既娶而奪之又生壽
朔已能同母譜兄壽又能代為使者越境非
十歲以下兒所能辦然則十九年之間何以處
之此決無之事特春秋好事者為之耳予以此
曲名雅而失其實因舉以歸之岳將軍飛飛當
宋南渡以減金復讎為已任高宗嘗賜大旗書
其上曰精忠飛每戰寘於前行中興之功計日
可成而卒斃于權奸秦檜之手當其就獄裂裳

見背有舊涅盡忠報國四字深入膚理予以是
深悲之故為此曲鳴飛之不平而聲櫓之罪以
待後之製樂者采焉

大旌之搖搖兮寘我前行主錄臣忠兮臣不敢忘臣
之志兮復舊疆以忠鏤骨兮臣亡與亡孰不臣諒兮
罪臣無將不愛一死兮臣志未償願主母以臣兮卷
旌而藏

仙居書屋操

戶部尚書兼翰林學士淳安商先生所居之旁有
深洞焉先生少時嘗構舍讀書其中其後發解南
省廷試皆舉第一先生之子良臣復取進士為編
修好事者題其舍曰仙居書室新安程敏政為賦
琴操二章

我屋我書以仙而著稱兮
宣儒之行而墨是名兮
有美一人不邀以征兮
我欲從之考其成兮

惟士之進辟之於登瀛兮
矧彼翁子接武于西清兮
永

言配德茲山之靈兮嗟若之言亦孰得其情兮

雙瑞

雙瑞美徐公也公以儲端居親之喪廬墓側有孝
感焉既免而入朝天子寵嘉之晉少宗伯貴及其
子家慶迭臻其瑞也驗故聞者美之而作是詩也
義興之郊有山隆隆孰窳其親有孝徐公有廬蕭蕭倚
山之麓徐公是居哀慕孔篤爰有鳩二來巢于梁其色
縞縞如君子裳鴈鴈于飛日泳于渚濯濯其儀擾而不

去觀者動色異口同詞有瑞徐公維天錫之一錫不已
乃至於再發彼慶源如水斯溉濟濟徐公改服來朝貳
命秩宗維慶之昭允顯其身亦顯其子奕世光榮維慶
之似維孝錫類慶與之俱孰瑞之誣而大其閭慶也無
涯勗哉令德匪瑞之夸繫孝之式

右雙瑞八章章四句

雪崖操

汶川宗人志端性高潔喜吟咏嘗私淑於郡守永

嘉孫公墨梅妙得其傳因以雪崖自名觀所好知
其人也予為賦琴操二章俾天寒歲暮梅花盛開
之際啓山窓對雪崖而鼓之豈不有助其清興之
萬一乎

維雪皓皓言積其崖匪伊梅兮孰鬯予懷乃賡載歌其
音孔嘉歲寒有盟願與之偕

維崖嶹嶹言沍其雪匪伊梅兮孰闕巖穴載傳之圖其
色孔潔有盟歲寒我心則說

思親堂

思親堂者眉山七十三翁萬君子富之所作也翁
弟先生以高文碩行為天子元輔屢受命書褒其
上世而翁猶似不忘其親若將終身然此詩之
所由賦也

有堂渠渠有客似似言思其親日甚一日堂上有山堂
下有江伊親之思江山靡長赫赫宮保維客之季煌煌
命書屢賁于隧客拜稽首家慶孔延維菽與水下不及

泉乃作斯堂奉妣暨考若著若存于以終老繄繄極兮
孰逃親仁越終慕兮孰非子身容哉孝思亦既耄矣德
既邵矣式克肖矣孝思維則世徵于堂爰錫厥類斯堂
之光

右思親八章章四句

壽鞠

壽鞠壽泌之焦父也焦父年七袞其生在歲之重
九與其曾大二祖同日其受太史芳之肥封也誥

命之下亦在是日焉

有壽者鞠其色孔黃月日維九薦此令芳有壽者鞠其
味孔甘和以醇酒禮庭燕酣誕是花辰維泌焦父異世
同生曾大二祖維泌焦父子為從臣有來恩綸及是花
辰永言禮庭鞠本堅好載植載培對爾壽考永言禮庭
鞠薦滋蕃積慶開先宜爾孫玄

右壽鞠六章章四句

芝頌

故太師定興張忠烈王佐太宗靖難為元功歷洪
熙宣德正統三朝參軍國事為耆德忠勲並隆而
下安南之績尤偉惜紀載弗詳焉王薨之四十年
今太傅兼太子太師嗣英公始得其詳于閩人之
侍王者乃請禮部尚書瓊山丘公重加序訂立穹
碑于墓祠之前未幾守墓者以芝產告一本九莖
狀如朶雲其色黃其本紫蓋天昭王之偉績表嗣
公之懿孝故其瑞應若茲宜有頌章以侈其盛俾

祀王者歌于廟中顧走之謏薄不足與此然與嗣
公同侍經幄同在史館嘗獲觀其芝于堂則聲其
事以備能言者之先驅亦誼之不可辭也

有翼者丘在國之隅有屹者碑在墓之衢孰藏于斯山
回川抱曰定興王維國元老緊定興王維國虎臣不世
之功視彼交人維交有州故中國地孰遣弗庭而自為
異王往征之如鷹之揚殄賊于荒脫人于湯還定招來
乃郡乃邑告功廟社禮絕班級功既往矣而弗及詳家

乘無徵聞者孔傷濟濟嗣公今天子傳爰訪爰蒐得上
功簿如獲拱壁如還大弓奉告于祠天相予衷乃屬鉅
公爰輯爰次大書特書神畀予志乃刻貞珉金薤青瑤
遠映宸奎上逼璇霄松栢九九巽負蠱蠱蛟螭蜿蜒后
土駭肅碑既樹矣忽炳其靈有芝來生一本九莖數協
陽爰狀若雲朶孰幻之根孰名之蓀其色正黃毓秀中
央其本紫兮載揚其芳守者走告觀者如堵謂此奇祥
匪今斯古維王之功愈遠而明維公之孝彌久而貞芝

生于房于漢中葉祝國之釐明明載牒芝見于庭有晉
世臣兆家之昌孫子振振維王之功震于南土與國咸
休盟在冊府維王之後世顯中朝如石如玄橫玉珥貂
享祠巍巍王在中寢公子是承有苾其飲俎豆煌煌王
降于堂公孫是將維食之香天顯相王河間之胄維本
之固而未之茂天顯相王三岡之阡劒舄之傳維吉之
延史臣作詩以頌厥美一章之榮百世之紀

野哭

野哭美吳孝子顧顥也

野哭者誰子伊氏維顧弗安于寢言思其父言升其堂
言撫其牀音容無方乃築室于場匪言斯揚維以永傷
維草萋萋維木緊緊于今三年而身之瘳兮而志弗餒
兮日往于田號泣于天有鳥有貍亦子是憐維孝思則
然孰吳之區而有斯士孰顧之宗而有斯子維士子兮
家之紀兮里之砥兮維士子兮亦孔之名維有司之稱
維帝之旌

右野哭六章二章四句二章六句一章五
句一章七句

篁墩文集卷六十一

欽定四庫全書

篁墩文集卷六十二

明 程敏政 撰

詩

詠史十四首

重華受堯禪揖讓何雍雍奉堯若考妣臣道盡始終夏
王繼虞統心與重華同漢家逆操子亦欲希前蹤如何
臣故主貶號山陽公

周公作周禮本以致太平後來講求者往往亂自生一

悲新室篡再苦新法行善哉豫公語萬古當作程關雎
與麟趾此化何時明

寄生根不牢螺贏種還異當時浪自喜久遠安可計鄙
哉文信侯蕞爾琅琊吏坐令秦晉史半作他人帝厲階
誰所啓剿滅固天意獨喜趙王孫世主沙漠地

霸王弑義帝漢祖誅元勲君臣道既絕可得全其身平
生固不同畢竟同一死不知垓下劍何似淮南矢

王陵在漢軍母伏劍于楚趙苞守漁陽母作鮮卑虜二

子皆名臣忍獨遺其母忠孝有偏重賢者當自處我愛
徐元直翩然別新主

大獄考巫蠱窮兵擊狂胡壯心一朝悔剛斷今古無輪
臺詔西極望苑起後湖朝歌罔怪者社稷終為墟

世祖中興主手拯三綱頽溫溫東海王廢棄同草萊子
房致園綺國本無驚猜乃知隆準公決斷何雄哉鄧侯
奉朝請嚴生歸釣臺高光可並駕史論空喧逐

孔明討漢賊凜凜三代師廣廈既已傾一木安可支想

象鞠躬志慘澹風雲姿亦有王將軍舉義何孜孜伐陳
奉孱主百折無回辭嗟哉古烈士萬世同一時

健為李孝子本是漢家人不受鄴中詔名節今古聞胡
為讓官表自稱偽朝臣我欲刪此語庶作無瑕珍客言
且勿刪不見揚子雲已受中散祿更上美新文

洸洸死後名赫赫生前功古來賢達士謙伐心靡同灑
涕峴山頂沈碑襄水中惜哉羊與杜此念何匆匆

煬帝伐煬公親自提戈戟殷鑒尚不遠何況目所擊如

何大業紀半是亡陳迹由來昏德主先後同一失所惜
貞觀君再發遼東役

太宗內巢婦不懼辰羸恥後來聘充華聞諫即能止昏
昏復昭昭哲后固如此古云狂作聖歛袂觀唐史

趙氏有家法不戮士大夫秦濟兩宗王恨骨猶號呼親
親既如此朝野將何如飛愚社稷臣東澈周孔徒一朝
恣礪斧不啻厖與豬宋人善粉飾此語良不誣

宏範北元帥世傑南將軍兩人本兄弟奉主各致身厓

金匱要略卷六十二
山颶風起頃刻生死分烈烈萬古忠矯矯一世勲我方
編二史執筆揚其芬

雜詩二首

苦暑夜不寐起讀月令章乃知季夏後有土居中央下
以開素景上以承朱陽寒暑相代謝天運固有常如何
厯家算視此殊乖張謂是大火西柔金遇而藏三庚作
三伏坐使元化戕試問邇者誰眇眇秦漢王恭惟大統
厯賢者宜消詳

西域當時微月見西北元有耶律氏遂作庚午歷斯
人非妄者乃是目所擊流沙與昧谷萬古地不易相傳
無此語止謂哉生魄天道豈不常推移在異域何得起
巫咸為我究其迹

隱士五首

楚狂

天王不西狩列國多遊士楚狂獨何人長歌向夫子慷
慨鳳德衰當已胡弗已晏歲草木蕃吾道亦云否岐山

鳥不至吾已方自此

沮溺

辨士朝入境莫享祿萬鍾胡為兩遺老墾此荒田中行
行問津者日晚悲途窮邯鄲殺鳴犢頸血流殷紅臨河
返車轡太息尼山翁

荷篠

丈人皓鬚眉以杖荷其篠不暇與客言耘此田間草日
暮遊客來雞黍聊結好膝前兩兒郎終歲足溫飽栖栖

陳蔡間弦歌向誰道

晨門

石門何巍巍下有司晨者擊柝夜不堪隨分老田野中
原多戰伐仁義若土苴棲遲復何為所幸知者寡何意
魯乘田終年走車馬

荷蕢

于于田舍翁行行荷其蕢過館聞磬聲知是客遊衛嗟
此行路難莫道隱居易徬徨野水側淺揭深則厲多少

垂桴心終成半途廢

古詩二首

牆東馬纓蕊朝開夜還合
牆西木槿花朝放夜已落
化機有常運物性固難鑿
胡乃萬物靈冥行苦不覺
得失覺何有終身浪悲樂

新秋原野淨閒步西山麓
山上有驍媒山下有麀鹿
見之感物理不覺心煩促
天生本同類何忍自魚肉
弋人前致詞弋具未為毒
不見餘耳交一旦

成翻覆

乙酉歲瀛東別業雜興集古

獨在異鄉為異客王摩詰十年蹤跡走紅塵陳希夷歸

來池苑皆依舊白樂天萬紫千紅總是春朱文公

不妨遊子芰荷衣杜工部散髮行歌自採薇秦系洞裏

幽花莫相笑歐陽公此心非是愛輕肥張乖崖

與客攜壺上翠微杜牧之暫時相賞莫相違杜工部白

鷗自信無機事趙子昂見我猶穿曲岸飛司馬公

雞犬圖書共一船杜牧之傍花隨柳過前川程明道醉

來睡著無人喚杜荀鶴只在蘆花淺水邊司空曙

春風疑不到天涯歐陽公且在芳尊戀物華杜工部謝

却海棠飛盡絮朱淑真一年容易即黃花王荊公

空林獨與白雲期王摩詰一任輕風拂面吹朱文公細

數落花因坐久王荊公起來幽興有誰知關

滿架薔薇一院香高千里暫偷閒臥老僧房關日長睡

起無情思楊誠齋閒拂塵埃看畫牆王仲至

憩鄭州

鄭市猶如此揚鞭幾度過
荒城臨曠野古廟控長河
境勝爭先覩詩慳取次哦
少年今老大感慨若為多

宿資勝寺與王文與進士夜談

載酒朝相過論心夜未中
卧殘禪室冷談徹講堂空
香篆銷輕縷燈花落小紅
好懷攄不盡鐘起院牆東

奉送浣齋先生之喪至通州晚渡渾河嘴重宿

安仲和家有懷士欽時成
化丁亥四月一日也

曉隨軒蓋下通津舊館重來歎此身千里關河丹旆遠
十年賓主白頭新開尊見月猶前度倚柱看花及暮春
腸斷夜來停櫂晚白沙漁火照離人

四月五日微雨免朝與李太史世賢步出皇城
門喜而有作

輕陰小雨夜連晨中使傳呼散紫宸天氣薰蒸疑作暑
風光回轉欲留春班分輦道花迎佩仗出宮牆柳映人
獨喜聯鑣歸去早六街消盡馬蹄塵

送黃欽都閫出守洮河岷三州

前歲平遼過海東今年分陝駐湟中
三城斥堠提封遠千里蕃戎節制通
開府欲施經濟策留屯先上便宜功
從來禦侮須才俊莫向沙場歎轉蓬

早朝

出門四顧人影滅杵聲尚響城南樓
喜看明月在屋瓦無奈黑風吹布裘
銀河斗柄澹欲沒御沼浪花寒不流
馬蹄且入待漏院五更供奉殿東頭

郭主事分司百步洪作雙堤以禦水患行者便

之

百步洪連舊楚城分司誰是濟川英才驚夾岸雙虹起
便覺行舟一擢輕霜入芙蓉秋漲落風回楊柳暮烟生
何時醉倚黃樓月重聽王郎笛裏聲

有懷汪希大因其從子守貞南歸賦此奉柬

泥緘欲寄少雙魚為託歸鴻問起居仗劍不來干七貴
草玄應合繼諸儒京華夜短愁無夢故國春深樂有餘

我欲家山結新社不知泉石近何如

尋梅徑為許廷冕職方賦

老圃南通一徑回天寒初放隴頭梅野人竹外扶筇至
地主花前載酒來短笛吹殘江戍角暗香飛度石城隈
晚晴記得歸時路海月昏昏照古苔

八月二日與謝鳴治太史分獻文廟時大學士

彭公主祭

鳴佩朝來下紫宸孔庭分獻屬詞臣尊崇聖道推當代

追從元僚愧此身祀禮周旋終丙夕文星璀璨報丁辰
同寅況是多才子聯轡趨朝夜向晨

病中

半生多病不禁秋纔入西風已倦遊官組幾時忘世慮
藥囊終日為身謀旁人莫比相如渴蹇我元無宋玉愁
獨有舊書緣未了一編時復置牀頭

九月十八日與李士敬登樓

小窓斜向厓山開有客閒憑亦快哉紫禁烟花從北繞

太行秋色自西來
掀髯欲作凌雲賦
回首慚非跨鶴才
月夜有期重過此
共君攜手望三台

送安成李君丞休寧縣

君致政宗伯先生之子
于同年友侍御廷璋之

也兄

雛鳳翩翩早應徵
一官恩命羨初膺
久知柏府難為弟
近喜松廳不負丞
行處漸看春似錦
離人何惜酒如澗
故鄉有問京華事
多病年來客茂陵

題小景雜畫

青
山
一
髮
海
中
央
島
霧
昏
昏
拍
岸
黃
過
客
不
堪
腸
斷
處
尉
佗
城
下
水
如
湯

野
梅
開
遍
釣
魚
磯
杖
策
歸
來
雪
滿
衣
記
得
西
湖
山
下
過
一
雙
青
鳥
背
人
飛

綠
樹
蕭
然
蔭
草
亭
酒
船
安
近
蓼
花
汀
分
明
一
夜
溪
頭
雨
洗
出
春
山
數
點
青

小
亭
斜
枕
石
溪
濱
長
夏
空
山
草
木
薰
風
雨
忽
來
歸
去
晚
櫓
聲
搖
碎
一
川
雲

漁翁獨棹木蘭舟
白草江亭兩岸秋
款乃一聲天漠漠
望中家在夕陽洲

岸草微茫接遠天
菰蒲深處有人烟
夜來雨過灘聲急
短棹誰家上水船

約同年諸君子遊梁園

年年冷落帝城春
長恐花神解笑人
明日梁園尋舊約
不妨同踏軟紅塵

送汪孔達同知嘉定州

時餞行于月河寺
北山晚翠樓上

手持新牒佐明州州在川南最上流絕道盤雲迴樹杪
怒江飛雨過城頭簿書永日渾閒事燈火良宵憶舊遊
從此相望天萬里思君時上北山樓

家君南征還次國門宿觀音僧舍予來迎遂憩

聽上人所別賦此詩

路入招提燕尾分老僧迎拜話殷勤山門幸駐尚書馬
禪榻須留太史文玉帶高情空吊古紫衣殊錫定超羣
與君暫別還惆悵回首東城已暮雲

送吳學士先生還安成

五朝供奉眼中稀
又見投簪出禁闈
曉日東城雙佩遠
春風南浦一帆歸
青山佳處閒攜杖
紫陌輕塵不上衣
回首王城清思在
暮江空闊看雲飛

夜坐

鈎簾坐夜深
月色涼可愛
遠響忽驚心
風動枯荷蓋

成化五年冬至日再與世賢太史陪祀西陵次

廉伯惠詩韻

出土城

古長城下凍嵐深冰斷河隍雪滿林岐路忽分雙堠側
諸陵遙出亂峯陰道傍逆旅應相認石上題名半可尋
前度近臣今再往臨風徒切抱弓心

清河道中

黃沙風起出茅深獨擁重裘過遠林野犬吠人來道左
山翁留客坐牆陰晴光漸向城頭轉好句還從馬上尋
莫遣奚囊空獨往等閒孤負陸機心

發昌平抵齋所

一望橋山路轉深
北風蕭颯撼空林
明樓半出青雲上
輦道平分碧樹陰
馬過山城晨未啓
人歸公館夜相尋
九龍池在前峯下
何日來遊副賞心

謁西陵

玉磬聲殘漏已深
西陵燈火透松林
簷鈴陣陣傳風色
寢樹重重結暮陰
輦路銅駝空在望
橋山珠鳥杳難尋
先皇誕日還隣近
惆悵君王此夜心

昌平城外曉行望劉諫議祠

直北峯巒紫翠深
行人倚馬度平林
海東霞氣揚朝彩
溪上風聲破午陰
多病此回成潦倒
舊遊何日事幽尋
劉郎說有荒祠在
慷慨當時射策心

沙河有作

前村籬落望中深
一縷青烟起隔林
飲水馬嘶沙岸嘴
避風人坐石橋陰
好懷僅足成孤詠
勝境何曾得重尋
歸日定須招二子
小堂呼酒一論心

與李賓之遊海雲寺後園

偶過都城北來遊古澗濱微風清細暑小雨浥輕塵忽
起殊鄉念聊閒薄宦身何時重載酒同作看花人
堤上行人少同來酒半醺日光穿密樹雨意隱層雲客
就蒼苔坐農將翠稻分塵纓如解濯剪取碧波紋
幽勝欣初得塵囂暫一忘新荷紛衆綠老樹挺孤芳眺
遠登山徑臨清憩野塘不知坐談久花露欲沾裳

夏夜有懷二弟

小院初過雨涼生白苧衣吟餘風動髮坐久月侵幃柰
子紅猶淺荷盤綠漸肥物華空滿目江鴈故多違

送管河陳善僉事考績還張秋

刺豸盤雲上錦袍三年持節有賢勞秋河曲堰連千里
曉岸危檣列萬艘汶上野人知姓字齊東行旅識旌旄
重來白簡增光采不負青雲舊俊髦

送齊王傅翰林檢討張伯仁從征荆襄

落落胃藏十萬兵襄樊已覺望中平雙璫夜出諸王館

一劍晨趨大將營，聖主便應休戰馬。
旁人敢復笑儒生，不須負弩煩州縣。
夾道兒童識姓名。

送孫舜卿學士先生致仕還杞

十四年來侍講筵，承恩一旦許歸田。
官辭帝里心終赤，身拜親闈髮尚玄。
松菊未荒陶令宅，圖書重上米家船。
同鄉先達應無數，勇退高人說姓錢。

題王秋官文璵所藏三朝制策

三葉才名動冕旒，法曹能不墜箕裘。
裘錦囊留得奎文在，

好貯齊雲十丈樓

徐伯輔御史承恩堂

裕後家聲久推封帝澤濃兒衣金刺豸官誥錦盤龍貯
廟題新主懸真易舊容堂名應不泯千載慶遭逢

送李廷珍行人出使占城

帝遣皇華使宣威向海東夜行占北斗曉發待西風
背番城近螭頭漢節通定知唐李揆清譽播蠻中

輓金芸窓

陸文量主
事作志

寂寞九原士風流萬石君
霜凋南國蕙塵冷北窓芸
水移先業吳涇卜近墳從
知稅侯裔不媿陸生文

送李士欽符臺冊封代府之作

冠佩紛紛聽曉雞又承天語下金閨
仗前雨露隨龍節塞上風雲襯馬蹄
傳詔百年誇盛典鳴鑣三月重分攜
莫將遠役縈懷抱此日雲中罷鼓鼙

王孫策馬佩吳鉤千里薰風屬壯遊
使府名高周一介親藩禮絕漢諸侯
黃花鎮北逢邊吏青草城東見驛樓

遙想出關回首處夢魂長繞殿西頭

官花盤繡上朱衣傳道符臺出帝畿護節鼓隨邊月動
辭家心逐塞雲飛韓侯戰處風烟冷漢帝行宮草樹稀
一路山川堪弔古馬蹄應帶錦囊歸

西涯十二詠為李賓之太史賦

海子

十里城陰道西湖一派分秋晴沙岸尾時見白鷗羣

西涯閣

臨水起高閣紅塵不相擾
中有草玄人時來看魚鳥
慈恩寺

積水池邊路祇園枕碧潯
灘聲終夜響如聽海潮音

楊柳灣

人行古剎西斷堤如露肘
隱隱釣魚灣青帘映疎柳

稻田

擺耜若青雲飛起雙白鷺
小立問耕夫恐是江南路

菜園

雨後青滿園野味亦可口時有鄰翁來攜筐剪春韭

桔槔亭

閒上桔槔亭潺潺聽水聲獨憐抱甕者空老漢陰城

蓮池

北渚秋風起紛紛綠映紅美人如不棄相約采芙蓉

西山

遠山如玉笋近山如翠苔池亭一柱笏爽氣逼人來

鐘鼓樓

巍巍百尺樓上有司晨館不似山城頭寒更有長短

響牖

涓涓月橋下水流互吞吐清夜往來人畏是潛蛟舞

飲馬池

訪君向北城我馬如渴虎溪女思得錢不辭提甕苦

吳橋張知縣瑞鳩圖

男耕女蠶民訟少曉起官衙見青草春風撥谷一兩聲
何處飛來鷓鴣鳥口銜枯枝入簷楹朝經暮營如有情

梁間作巢避風雨吏人往來還不驚吳橋城外多桑柳
不肯棲身向林莽但欲依依傍使君德政嘉符世稀有
君不見野雉馴中牟之令終秉鈞和氣從來多感召會
看旌異下楓宸

輓張世璉舍人

去年君家會隣曲芙蕖花紅池水綠今年君死藤束棺
芙蕖花落池水寒明年花開對新主太息人生幾何許
楚些招君君不來斜日虛堂淚如雨

保竹

盧郎中廷佐之祖號竹軒父號竹隱廷佐因號保竹且請吳人張廷瑞作圖求詠

三世相傳愛此君清風搖動暮江濱一時舊業今誰守
雛鳳方空百鳥羣

遊宦京華覺歲侵江東舊竹可能尋千金買得吳人畫
傳與兒孫繼此心

題莊子觀泉

已將飛蝶幻孤身却玩流泉古澗濱可惜一回川上趣
當時無分見耶人

送李賓之編修展墓還茶陵

王孫承詔尋松檟詞客臨岐贈柳枝
天祿曉風聽漏處洞庭春水放船時
紉蘭定著三閭賦看竹還過二女祠
我亦懷鄉頻作夢不堪重寫送君詩

送南京鑄印局副使張懲兼致意乃父廷端

薰風流水綠楊橋一客承恩下九霄
小篆極當宗伯選尺書曾赴信陵招
筵開祖道晨醺酒舟入官河夜候潮
老鳳相逢煩致語不應長繫木蘭橈

簡汪汝溫

只耽佳句不憂貧
旅食京華十二春
草檄才名驚蜀將
看花丰采動燕人
短檠夜榻悲雙鬢
長劍秋城寄一身
老大功名須到手
銜杯休負菊花辰

出塞行

與羅璟明仲謝鐸鳴治李東陽賓之倪岳舜咨焦
芳孟陽同飲彭教敷五宅喜官軍將征迤北而作
丙戌十月

漢家將軍如虎貌

環

鐵衣炯炯登彤墀

鐸

鞠躬再拜向

天子

東陽

肘繫金印盤雙螭

敏政

陰山之陰單于宅

岳

名王

渠帥相出沒

教

天誅一顧不可留

芳

旌旗如雲戒明發

環

袖中劍氣吞長虹

鐸

拍麾白日回蒼穹

東陽

偏師五路

擣沙磧

敏政

鐵騎十萬屯雲中

岳

皇威四馳掣驚電

教

膽

落旄頭逐飛箭

芳

降車畫走穹廬王

環

捷書夜報明光

殿

鐸

君王有詔無窮追

東陽

凱歌散入邊城陴

敏政

滿決銀

河洗兵馬

岳

盡收土宇歸華夷

教

明廷告勒有尊敦

芳

鉅筆如椽我當載

璟

酒酣擊節聊載歌

鐸

一為將軍歌

出塞

東陽

元夕燈詩十首應制

起火

活火翻成一縷烟
暖風吹上碧雲邊
須臾響作春雷起
萬紫千紅獻帝前

牡丹

曾燒銀燭照紅粧
貪睡花神夢正長
高卧不知身已幻

碧紗籠裏度春光

金蓮

內前花炬刻金蓮
徹送儒臣事漫傳
此夕一枝光照夜
顧因觀賞監當年

木香

煌煌火樹照金門
不倩韓郎為染根
御苑春光長不老
好花開到木香盆

石竹

銀缸分出影參差
旋點朱英上綠枝
一夕自開還自謝
化機誰謂有停時

玉簪

一種名花號玉簪
冰容斜倚翠雲衾
誰知點綴春宵景
盡把芳心變赤心

古老錢

字畫依稀古老錢
火中埋沒幾團圓
休言轉眼全無用
買斷鰲峯不夜天

蝶戀花

鰲山花卉競春紅
舞蝶時來趁暖風
一霎不知何處在
恍疑飛過漆園東

飛火

夜深燈火下蓬萊
一片飛霞燭上台
簫鼓不驚仙漏永
芙蓉芍藥滿山開

金菊

巨鰲峯下彩雲深
誰遣秋容入上林
始覺化工生意溥

菊花新放滿枝金

與亨大懋衡二太史天瑞元益貫之三給事同
遊神樂觀是日廉伯有約不至

城樓旗角蕩朝暉行入郊坰訪翠微塵淨石壇門閉早
蘚封山徑客來稀柳陰間繫青驄馬花氣濃薰白苧衣
南郭堤沙平似掌不妨身戴月明歸

城南策馬一經過眼底偏驚樂事多地主旋開桑落酒
山童能唱竹枝歌翠雲宮殿聞玄鶴青草池塘見白鷺

却愛道人幽獨好幾時攜手入烟蘿

宿雨初晴曉出關偶然行樂便忘還
碁聲互答聞松外
詩韻分題寫竹間
鰲背朶雲瞻北闕
馬頭殘照見西山
故人何事紅塵裏
不共知心半日閒

送楊朝用揮使受代還金陵

將軍才子重文韜
楚楚登壇一鳳毛
禁闕柳迎新試馬
轅門花拂舊征袍
離亭曉日紅塵動
歸路秋風白浪高
江上太平無戰伐
不須重淬百金刀

送董尚矩編修省親還寧都

三載抽毫近御屏一封優詔許歸寧
親闈寵浥鈞天露文苑光回午夜星
澤國離筵秋看劍河橋撾鼓畫揚鈴
鄉人定識江都裔曾把天人對漢庭

題青州先賢祠

太守李
昂重建

青州名蹟半荒涼只有叢祠古道傍
百代英魂隨水去一方遺澤共山長
秋來廢苑甘棠老春到空階碧草芳
聞說西平賢太守懷人時見菊花觴

分得戲馬臺送李應禎舍人還江東

拔山壯士重瞳子一戰睢陽萬人死歸來戲馬築高臺
四顧憑陵劍光紫霜蹄騁裏空復多騅不逝今將奈何
芳草千年臺下土西風一夕帳中歌王孫衣錦還江左
楚樹青青繫征舸登高把酒問興亡芒碭山頭日初墮
苜蓿花殘春水生懷古匆匆不盡情回首荒基何處是
淡烟疎柳隔彭城

中伏日西風大作三日晝寒

暑氣方全盛秋風忽大來庭柯雕翠色書案積黃埃病
欲披新絮愁思撥舊醅遙知田舍子心事又成灰

壽潘貢士父

七袞行將近祈年趨晚菰稱觴來野老捧食拜溪童玄
髮經霜白酡顏暎酒紅名郎歸侍綵佳氣滿吳中

夏月有懷

露坐南楹下東城夜未央上簾邀月影移席趁荷香病
覺吟身瘦眠愁客夢長星河淨如練因爾歎殊鄉

輓余鍾母

女為崇
王妃

一夕護花慘不開滿庭涼露鶴聲哀
神姬約伴遊仙去
帝子親書遣祭來
古道悲風吹絳旒
玄牆陰雨上青苔
倚廬人誦南陔處
愁見當時玉鏡臺

樂丘八詠分得卧虹橋為沈時暘主事乃翁賦
五湖東半落楓橋
隱若晴虹破寂寥
漫漫芙蓉難識路
陰陰楊柳乍通潮
分披野色尋幽慣
倚徙江天入望遙
想去樂丘應不遠
過從時復見漁樵

病起

卧病經旬久開窓思有餘不知秋幾許黃葉滿庭除

中秋病中時與李士欽叔姪近別


西風能幾日此夜忽中秋宇宙清如洗山河影欲流
病身愁對酒羈思懶登樓遙想南歸者淒涼共一舟

雲樂

孟子以父母俱存兄弟無故為一樂僕實有之而不
免于梁公望雲之思杜子看雲之憶因題其所

居之室曰雲樂

居官淹冀土全室住江關弟妹身如玉庭闈髮未班晝
眠思劒外晚眺近西山擾擾紅塵裏何時解綬還



篁墩文集卷六十二